

MARK Miðstöð margbreytileika- og kynjarannsókna

Center for Research on Diversity and Gender

1 gr. Almennt

Miðstöð margbreytileika- og kynjarannsókna er starfrækt á Félagsvísindasviði Háskóla Íslands. Að miðstöðinni standa kennarar og fræðafólk á Félagsvísindasviði sem stunda rannsóknir á sviði mannréttinda og mismununar, jafnréttis-, kynja- og margbreytileikafræða í víðum skilningi. Miðstöðin heyrir undir Félagsvísindastofnun með vísan til 27. gr. reglna nr. 569/2009 um Háskóla Íslands og 4. gr. reglna um Félagsvísindastofnun nr. 370/2009.

2. gr. Hlutverk og markmið

Miðstöð margbreytileika- og kynjarannsókna er vettvangur rannsókna og fræðslu á sviði mannréttinda og mismununar, jafnréttis-, kynja- og margbreytileikafræða í víðum skilningi. Hlutverk og markmið miðstöðvarinnar er:

1. að sinna og stuðla að rannsóknum á sviði mannréttinda og mismununar, jafnréttis-, kynja- og margbreytileikafræða í víðum skilningi,
2. að stuðla að samstarfi við innlent og erlent fræðafólk og rannsóknastofnanir á fræðasviðinu,
3. að veita nemum aðstöðu og þjálfun til rannsóknastarfa á fræðasviðinu með verkefnum á vegum miðstöðvarinnar,
4. efla tengsl rannsókna og kennslu á fræðasviðinu,
5. að sinna ráðgjöf og rannsóknatengdum þjónustuverkefnum á fræðasviðinu,
6. að efla yfirsýn yfir fræðasviðið, miðla þekkingu og kynna niðurstöður rannsókna með útgáfu, fyrirlestrum, fræðslufundum, málþingum og ráðstefnum,
7. að stuðla að marktækri og markvissri stefnumótun, umræðu og framþróun á sviðinu í samstarfi við opinbera aðila, atvinnulíf og þjóðlíf.

3. gr. Stjórn og starfsemi

Aðalfundur er æðsta vald innan miðstöðvarinnar. Rétt til setu á aðalfundi eiga kennarar og fræðafólk á Félagsvísindasviði skv. 1. gr. Aðalfundur kýs stjórn til þriggja ára sem forseti Félagsvísindasviðs skipar. Samráðsfundur skal haldinn a.m.k. einu sinni á ári og skal stjórn boða til hans. Samráðsfundir eru vettvangur fræðimanna á sviðinu til að kynna og ræða rannsóknir sínar og önnur verkefni á sviðinu auk málefna miðstöðvarinnar.

Miðstöðin er skipuð fimm manna stjórn. Stjórnarmenn skulu vera lykilmenn í rannsóknum Félagsvísindasviðs á þessu fræðasviði (prófessorar, dósentar, lektorar, vísindamenn, fræðimenn, sérfræðingar, akademískir forstöðumenn stofnana, eða aðjúntar). Hlutverk stjórnar er að taka stefnumarkandi ákvarðanir fyrir miðstöðina og fylgja eftir markmiðum hennar. Stjórnin fer með fjármál miðstöðvarinnar og ber ábyrgð á þeim gagnvart Félagsvísindastofnun og forseta Félagsvísindasviðs. Stjórnin sker úr í vafaatriðum sem upp kunna að koma um innri starfsemi miðstöðvarinnar. Stjórninni er heimilt að ráða framkvæmdastjóra eða aðra starfsmenn, eftir því sem ástæður og efni eru til. Aðalfundur kýs ráðgjafarráð sem skal vera stjórn til ráðuneytis skv. 4. gr. Stjórnin getur heimilað einstaklingum og rannsóknarhópum að vinna verkefni á vegum miðstöðvarinnar og skulu þau vera fjárhagslega sjálfstæðar einingar, sbr. gr. 4. Stjórnin skal funda

a.m.k. einu sinni á ári til viðbótar aðalfundi. Stjórnarfundir skulu boðaðir með a.m.k. þriggja daga fyrirvara. Formaður skal boða til stjórnarfundar óski stjórnarmaður þess. Fundarboð skal greina frá dagskrá fundar. Í stjórn skulu sitja bæði karlar og konur og skal þess gætt að hlutfall kynjanna sé ekki minna en 40%, sbr. 15. gr. laga nr. 10/2008 um jafna stöðu og jafnan rétt kvenna og karla. Stjórnin skiptir að öðru leyti með sér verkum. Miðstöðin er opin öllum kennurum og fræðafólki á Félagsvísindasviði sem stunda rannsóknir á fræðasviðinu, sbr. 1. gr. Sótt er um aðild til stjórnar miðstöðvarinnar.

4. gr. Ráðgjafarráð

Við miðstöðina starfar 5 manna ráðgjafarráð sem skipað er áhugafólki og hagsmunaaðilum á starfssviði miðstöðvarinnar, sbr. 3. gr. Hlutverk ráðsins er að vera stjórn miðstöðvarinnar til ráðgjafar og stuðnings við starfsemi hennar. Ráðgjafarráðið skal endurnýja á þriggja ára fresti. Æskilegt er að ráðgjafarráðið endurspegli raddir fræðimanna, sérfræðinga og hagsmunaaðila á fræðasviðinu. Aðalfundur kýs ráðgjafarráð.

5. gr. Fjármál

Miðstöðin hefur sjálfstætt fjárhald en reikningshald miðstöðvarinnar skal vera hluti af reikningshaldi Félagsvísindasviðs Háskóla Íslands. Fjárhagsáætlanir og uppgjör skulu samþykkt af sviðsstjóra Félagsvísindasviðs, forstöðumanni og framkvæmdastjórn Félagsvísindastofnunar. Ábyrgðarmenn einstakra verkefna, sbr. grein 3, eru fjárhagslega ábyrgir fyrir þeim. Heimilt er að líta á slík verkefni sem hluta af fjárhagi miðstöðvarinnar að fengnu samþykki stjórnar hennar. Tekjur miðstöðvarinnar geta meðal annars verið fjárframlög frá Háskólanum, styrkir úr samkeppnissjóðum, greiðslur fyrir rannsóknatengd þjónustuverkefni, tekjur af útgáfu, framlög, styrkir og gjafir frá stofnunum eða einkaaðilum. Miðstöðin skal tryggja að fjárhagsáætlun sé gerð fyrir öll verkefni sem unnin eru á hennar vegum og gera þau aðgengileg forseta Félagsvísindasviðs Háskólans.

6. gr. Aðalfundur

Aðalfundur miðstöðvarinnar skal haldinn fyrir lok september ár hvert. Stjórn hennar skal boða til fundarins með hæfilegum fyrirvara. Fundarboð skal sent öllum þeim sem aðild eiga að miðstöðinni. Rafrænt fundarboð telst fullnægjandi. Eftirfarandi málefni skulu rædd á aðalfundi:

1. Skýrsla stjórnar um starfsemi miðstöðvarinnar á undangengnu ári flutt og rædd.
2. Reikningar síðastliðins árs kynntir og ræddir.
3. Kosning stjórnar. Kjósa skal fimm einstaklinga til setu í stjórn til þriggja ára. Á fyrsta aðalfundi skulu þó tveir þeirra kosnir til tveggja ára.
4. Kosning 5 manna ráðgjafarráðs.
5. Önnur mál.

7. gr. Gildistaka

Reglur þessar, sem stjórn Félagsvísindastofnunar, hefur samþykkt, taka gildi 7. janúar 2011.